



TOUCHER

CENTURION ROLBALKLUB

CENTURION BOWLS CLUB

(www.centurion.bowls-club.co.za)

secretary@centurion-bowls.co.za

NUUSBRIEF / NEWS LETTER

Desember

2023

December



*Success is not final,
failure is not fatal,
it is the courage to continue that counts.*
- Winston Churchill



KERSBOODSKAP 2023: ONS PRESIDENT AAN DIE WOORD

'n Terugblik op gebeure binne ons Klub in 2023 lei onwillekeurig tot goeie herinneringe, maar ook tot herinneringe aan 'n paar hartseer gebeure. Ons moes vanjaar ongelukkig afskeid neem van drie van ons lede, Daan Opperman, Ben Bonthuys en John van der Veen, wat elkeen op 'n unieke manier diep spore in ons Klub se geskiedenis getrap het. Ons sal beslis voortbou op die lesse wat ons by hulle, as uiters gewaardeerde lede van ons rolbalfamilie, geleer het.

Ons Klub het gedurende 2023 van krag tot krag binne BGN-konteks gegaan en ons het tans drie Dames- en drie Mansspanne wat in die onderskeie Divisie-ligas speel. Ons top Mansspan wat vir die eerste keer in baie jare in BGN se 1ste Divisie-liga speel, sowel as ons top Damesspan presteer uitstekend - dieselfde geld ook in 'n groot mate vir ons ander Liga-spanne.

Ten spyte van 'n verlaging in ons ledegeld met die aanvang van die nuwe finansiële jaar, is die Klub se finansiële volhoubaarheid deur toewyding en harde werk vir die afsienbare toekoms verseker. Dankie aan ons absoluut toegewyde Bestuurspan wat ten spyte van 'n paar uitdagings, insluitend 'n uitgerekte staking deur die Metrowerkers, die leiding geneem en oplossings gevind het vir elkeen van die probleme wat hieruit voortgespruit het.

Ons grootste bate sal egter altyd ons lede bly en Centurion Rolbalklub kan met reg daarop aanspraak maak dat ons nie alleen die beste sosiale klub in die omgewing is nie, maar dat daar ook 'n sterk kompeterende gees en 'n gepaardgaande strewe na 'n hoë spelpeil heers. Baie dankie aan ons lede vir julle betrokkenheid in die Klub se werksaamhede, asook julle harde werk, wat ongetwyfeld 'n groot bydrae tot ons suksesse gelewer het.

Mag elkeen van julle 'n besondere geseënde Kerstydperk geniet en Christus as Verlosser in julle lewens beleef. Maak asseblief die beste van die feestyd saam met julle gesinne en families, waar moontlik. Ons dink ook aan die van julle wat die afgelope jaar 'n geliefde verloor het, of wie se kinders en kleinkinders oor hierdie tydperk nie by julle kan wees nie en bid dat julle ten spyte daarvan, vreugde in Christus sal vind.

Kom ons werk saam om ons klub se visie te verwesenlik: Om Centurion-rolbalklub tot die voorkeurklub in die BGN-omgewing uit te bou vir beide sosiale en kompeterende lede.

Op 'n persoonlike noot is dit vir my 'n besonderhede groot voorreg om deel van hierdie trotse klub en ons rolbalfamilie te wees!

Jurg Odendaal



HOOGTEPUNTE

Die worslopies bly 'n maandelikse hoogtepunt, met groot dank aan Tertius van de Venter en Leon Smith. Ronell van Zyl en Johan Meaker het die worsvaandel gedra op 9 November, en Helena Payne en Frank Wepener op 5 Desember. Welgedaan!



Op 3 November was die fokus op rolbal, en potjiekos! Die funksie is gereël om Afriforum paslik te bedank vir hul waardevolle werk om die perke in orde te kry te midde van 'n uitgerekte staking van munisipale werkers. Na genotvolle rolbal is die 48 deelnemers getraakteer deur die potjiekosmeesters Ted, Willem, Leon en Piet, asook Rina en helpers. Andre de Bruyn van Afriforum Centurion het sy waardering uitgespreek, en toekomstige samewerking in die vooruitsig gestel. Die funksie was voorwaar nog 'n pluimpie in die klub se hoed!

En toe breek die Jaareindfunksie aan op 9 Desember, met 'n verloop en standaard wat die klub net tot eer strek! Die verrigtinge het om 16:30 afgeskop met lekker kuier, goed gestimuleer deur die welkome glasier

sjerrie, en later opgevolg met wit of rooi wyn. Jurg het almal verwelkom, en toe 'n spreekbeurt gegee aan Rita van Rooyen van AVBOB. Laasgenoemde het die optrede van die sangeres Marlene Bezuidenhout geborg. Die daaropvolgende sangitems deur Marlene was werklik uit die boonste rakke, en het 'n voortreflike stemming geskep. Johan Meaker het die tafelgebed gedoen, waarna 'n uitstaande driegang-ete gevolg het.



Rina Meyer, saam met Karien Roos en 'n indrukwekkende aantal baie gewillige helpers uit die geledere van die klubdames het hul waarlik onderskei, soos ook blyk uit talle boodskappe van groot waardering wat op die funksie gevolg het. Ons lig die hoed, dames! Steeds het Marlene die ete afgewissel met welkome sang, afgesluit met 'n aantal Kersliedere. By laasgenoemde het klubtalent spontaan aangesluit - baie dankie, Adri, Wilma, Isa en Charl. Die bedankings is gedoen deur Bosman Olivier, en hy het paslik vir Rina en Karien met hulle helpers, asook Rita van Rooyen en Marlene Bezuidenhout uitgesonder. Die kroegbedienaars is ook vir hul harde werk bedank. Afsluitend het Bosman groot waardering teenoor Jurg uitgespreek vir sy bestuur van die klub. Die jaareindfunksie het soos 'n goeie sprokie geëindig - almal het baie tevrede huius toe gegaan om lank en gelukkig verder te gaan lewe. En so is hierdie mooi storie ook fluit-fluit uit!

VEERTIGSTE KERSIEFEES-ROLBALTOERNOOI - FICKSBURG

Maandagoggend, vanaf 09:00, het die eerste voertuie met 15 van Centurion Rolbalklub se spelers uit Pretoria vertrek, met die N1 langs na die eindbestemming: Ficksburg se 40ste Kersiefees Rolbaltoernooi! Daar het baie Whatsapp-kommunikasie plaasgevind om gereeld te verneem waar elk van die vyf voertuie hul bevind. Die tog was heel voorspoedig, alhoewel daar verskillende roetes aangedurf is. Maar helaas, al vyf voertuie het die teerpad/ grondpad/ slagatpad tussen Marquard en Clocolan moes trotseer. Dit was nogal 'n uitdaging, om dit nou sagkens te stel!

Dinsdagoggend breek aan en ons gaan eet 'n lekker ontbyt by die Rolbalkklub - heerlijk! Daarna tree al vier die Centurion spanne aan vir 'n fotosessie, wat soms bietjie hande uitruk weens 'n gekorswel en gelag! Die spanne se name was voorwaar inspirerend: *Three Beauties & a Beast* (Hermien, Maria, Adri en Conrad), *Centurion Warriors* (Bosman, Helena, David en vrywilliger Adri van Ficksburg)), *Green Sleeves* (Johan, Hendrina, Herman en Elize) en *Old Brown Cherries* (Hans, Marsha, Ernst en Zinda)! Drie wedstryde is die dag beslis, met 14 koppe per wedstryd. Die eersgenoemde drie spanne het heel goed presteer, maar *Old Brown Cherries* was prominent verteenwoordig aan die onderkant van die punteleer. Ai tog.



Dinsdagaand, na aandete by die rolbalkklub, was die kuier by die gastehuis heel feestelik, en het ons lekker gesels, stories vertel, baie gelag – natuurlik aangevoer deur die Lag-godin, Zinda! En 'n paar glasies rooiwyn, saam met al Adri se kwinkslae en vertellings, het gelei tot net nog meer gelag!

Woensdagoggend tree al vier Centurion Rolbalkklub se spanne aan, eers vir 'n goeie Ficksburg Rolbalkklub ontbyt, en toe rol die balle.... Na twee wedstryde breek middagete aan. Tydens middagete verneem ons dat *Old Brown Cherries* steeds die laaste posisie tot die uiterste verdedig... Bosman merk teenoor my op

dat *Old Brown Cherries* 'n goeie kans het om die posisie die middag af te staan aan die span van die Bethulie Ouetehuis. Bosman was verkeerd - ons het ons houvas op die laaste posisie verstewig!

Woensdagaand se ete by die Klub was weer eens smul-lekker! Daarna het ons saamgetrek op die stoep van Marsha en Hans se eenheid. Waarvandaan al die bottels rooiwijn verskyn het, was 'n raaisel - dis net skink en drink, praat en vertel, en lag nog 'n slag!



Donderdagoggend het aangebreek met ligte reën. Ons eet in die klub se 'makiti-tent' ontbyt, kyk na die weer en kan nie 'n opening in die wolke raaksien nie. Teen aanvangstyd word spel afgelas. Tyd vir prysuitdeling: *Green Sleeves* vaar heel goed en eindig uitstekend 11de uit 28 spanne. *Centurion Warriors* klou aan hul 23ste posisie. Kort op hul hakke in die 24ste posisie, is *Three Beauties & a Beast*. Helaas, *Old Brown Cherries*

het hul 28ste posisie suksesvol verdedig!

Ons almal kuier die middag om by die Kersiefees-terrein buite Ficksburg - dit kyk en koop en koop en kyk. Moeg geloop en gedra, sit ons aan by 'n tafel en peusel ietsie en geniet iets te drinke.

Die aand kuier die Centurion Rolbalstryders by die Sinkhuis restaurant. (Nee, nee, nie Stinkhuis nie - SINKHUIS!) Die kos was voortreflik, en daar is fluks 'n tweede rondte geskep, net om doodseker te maak van die smaaklikheid!

Vrydagoggend breek aan – en die rolbaltasse en sakke word aangedra, bagasie volg. Wat 'n wonderlike lekker week - so lekker gespeel, geëet, gekuier; voorwaar 'n fees te Kersiefees!



Drie voertuie vat die pad ooswaarts na Fouriesburg met die hoopvolle verwagting dat daar dalk minder slaggate en meer teerpad sal wees. Die *Old Brown Cherries* durf weer die bekende slagatpad aan! Dit begin opwindend raak, swenk links vir 'n gat, dan wydsbeen oor die volgende een, swaai regs om daai een! Breek, hier is 'n groot, diep een! Ons is op die terugtog toegerus met 'n paar R2.00 muntstukke, om van die informele padwerkers wat slaggate met grond opvul, te vergoed. Dankbare hande word uitgesteek, om die geldjie te ontvang. Een werker veroorsaak 'n knop in my en Zinda se kele, met 'n eenvoudige "Dankie" – vir so min!

En ek dink aan Elvis Blue se liedjie:

"Al sou ek alles weggee..... ek het meer as genoeg!"

Ernst Müller

VANWAAR GEHASI?

Koos van Dyk



Dagsê, my naam is Koos van Dyk. Meeste van u ken my nog nie want ek is nuut by die klub. Ek is gevra om kortliks van my lewe te vertel. Ek is 'n privaat persoon, so u kan dink dat hierdie nie vir my maklik is nie.

Ek is in Brakpan gebore en een van vyf kinders. My pa was 'n boukontrakteur en my ma 'n tuisteskepper. Ek het skoolgegaan in Brakpan by die Laerskool Brenthurst. Ek kon vinnig hardloop en was jaarliks die vinnigste in my ouderdomsgroep. So kon ek Brakpan verteenwoordig teen ander dorpe rondom Vereeniging.

My ma was 'n asmalyer en het baie tyd in die Verre Oosrand Hospitaal deurgebring. Die dokters het vir my pa gesê sy moet na 'n droë klimaat toe trek. So het ek in die middel van 'n jaar op Aliwal-Noord beland.

Daardie jare het die provinsies se leerplanne verskil en was dit maar 'n moeilike aanpassing. Ek het op Aliwal-Noord gematrikuleer, goed gedoen op sportgebied en aan die heel eerste Craven-week in Oos-Londen deelgeneem.

Na skool het ek by die SA Polisiemag aangesluit en in Oos-Londen begin werk. Daarna is ek Polisie Kollege toe vir opleiding. Na my opleiding het ek as liggaamsoefening-instrukteur by die kollege aangebly. Na twee jaar het ek 'n verplasing na die Kriminele Rekordsentrum in Pretoria aangevra. Kortliks saamgevat, is die Rekordsentrum 'n plek waar alle vingerafdrukke en kriminele rekords van meer as 100 jaar gestoor word. Daar is ook plaaslike kantore oor die hele land. Die personeel woon alle ernstige misdaadtonele by om bewysstukke te versamel, foto's te neem en planne te teken vir hofdoeleindes.

Later is ek na Springs verplaas as bevelvoerder in die Oos-Rand. Daarvandaan is ek na John Vorster Plein in Johannesburg as Streeksbevelvoerder in Gauteng. Ek het my loopbaan in Pretoria afgesluit as Brigadier.

Ek is my hele lewe lank lief vir sport. Ek het rugby gespeel, aan die Comrades marathon deelgeneem en in gimnasiums geoefen. 'n Gesonde liggaam is vir my belangrik.

Ek was vir 50 jaar getroud met Lientjie. Sy is verlede jaar aan kanker oorlede. Uit ons huwelik is 'n seun, Jaco, en 'n dogter, Karin, gebore. Nadat Lientjie oorlede is, het ek my huis in Morelettapark, na 28 jaar, verkoop en na die Eldoraigne Aftreelandgoed verhuis.

Eendag by die kerk het Emile Haarhoff my genader en gevra of ek nie wil kom rolbal speel nie. Ek het gesê dat ek daaroor sal dink. Omdat ek gevoel het dat ek gaan vereensaam, het ek 'n maand later na die klub toe gery om te gaan aansluit. Na vier maande het ek reeds goed ingeskakel en wil vir almal dankie sê wat my laat tuis voel het. Ek geniet rolbal verskriklik baie en is spyt dat ek nie al vroeër in my lewe begin het nie.

BESTUUR

Sake wat tydens die bestuursvergaderings op 10 November en 8 Desember bespreek is, kom grootliks elders in hierdie uitgawe ter sprake, of word per WhatsApp aan lede deurgegee.

Belangrike datums vir 2024 is die volgende:

9 Maart: Fondsinsameling

8-12 April: Wees Gerus rolbalweek

11 Mei: Jaarlikse Meyerspark–Centurion byeenkoms te Centurion.

20 Julie: Vierhoekige byeenkoms (Villieria, Centurion, Lynnwood, Bronkhorstspuit) te Centurion:

3 Augustus: Fondsinsameling

Die volgende bestuursvergadering vind plaas op 12 Januarie 2024.

KOMPETISIES

Klub

Die Klubkompetisies vir 2023-2024 begin na afloop van die ligawedstryde.

BGN en Liga

BGN Ope-driespel is reeds afgehandel. Baie geluk aan Hermien, Maria en Tillie wat die kwarteindrondte gehaal het!

Die volgende inskrywings is ontvang vir komende BGN kompetisies:

- BGN Pare: Hermien en Maria, Tillie en Zinda, Tian en Brian, David en Hadri, Pieter Pretorius en Piet Swemmer, Emil en Eidel, Gerrit en Louwtjie de Jager.
- Midweek 4e: Eurika, Hermien, Maria en Tillie; Karien, Dorina, Rina en Zinda; Magdaleen, Hendrina, Estelle en Elize.

Wat die ses afgehandelde liga-wedstryde betref, kan ons klub met reg trots voel! Die Mans 1e span verbaas vriend en vyand deur puik prestasie as nuweling in die 1e Divisie, en beklee tans 'n puik 6e plek. 'n Opsomming van die stand van sake word in die tabel aangetoon. Welgedaan, en allerbeste wense vir die oorblywende drie wedstryde in Januarie 2024!

Divisie	Gewen	Verloor	Posisie
Dames 2	5	1	2
Dames 3	5	1	2
Dames 4	1	5	6
Mans 1	7	5	6
Mans 4	6	6	7
Mans 6	6	4	2

ROLBALONTWIKKELING

Daar is aanduidings dat die klub afstuur op 'n tekort aan Derdes en Skippers, en in dié verband word spesifieke intervensies beplan.

Drie potensieële nuwe lede ontvang tans afrigting, met groot dank aan die afrigters, naamlik Leon, Hermien, Bosman, Wim, Ernst en Zinda.

Die Woensdagmiddag parespel in 2-4-2-formaat is steeds 'n groot sukses, met telkens 'n aantal kandidate wat wil speel op die waglys. 'n Baie spesiale dankie weer eens aan Leon Smith vir al sy moeite!

LEDESAKE

Verjaarsdae in Desember

4	Ernst Müller	22	Barend Lundie
11	Theo Munroe	26	Martelize Prinsloo
12	Cathy Austen	27	Adri Behr
18	Yvonne Clausen	27	Emil Haarhoff
19	Piet van der Merwe	31	Ted Harley

Verjaarsdae in Januarie

1	Johan de Villiers	16	Ronell van Zyl
3	Francis Slabber	17	Hermien Velleman
6	Priscilla Lamprecht	27	Mari Flint
7	Annatjie de Wet	27	Rina Meyer
16	Andre Jacobs,	29	Pieter Brits
16	Kas Landman	29	Etienne Olckers

Verjaarsdae in Februarie

2	Jorrie Jordaan	19	Marsha Greyling
5	Danny de Lang	19	Wilma Olivier
8	Gert van der Westhuizen	20	Ann van der Veen

11	Helena Payne	22	David Engela
12	Lavonne Austen	24	Elsa Mostert
12	Louisa Meyer	24	Isa Theron
15	Adi Joubert	24	Jock van Schalkwyk
15	Linda McGregor	25	Estelle de Beer

Nuwe lede

Ons verwelkom graag as nuwe lede wat tans nog afrigting ontvang vir Patrick Pritchard, Johan Jansen en Willem Prinsloo. Baie welkom aan elkeen, en mag julle verbintenis met die klub lank en aangenaam wees!

Lief en leed

Ons innige meelewing met Mari Flint, wie se eggenoot James na 'n lang siekbed oorlede is.

Beste wense vir mooi beterskap aan lede wat op een of ander wyse uitdagings beleef (het) met gesondheid. Ons dink veral aan Andre Lightfoot en Piet Schutte.

Wat 'n vreugde om Gert Goosen weer onlangs van aangesig tot aangesig te sien!

Speeltye (Somer)

Dinsdae - gemengde spel, skyfies in 8:30 vir 9:00

Donderdae - gemengde spel, skyfies in 8:30 vir 9:00

Saterdag - gemengde spel, skyfies in 13:30 vir 14:00

Spel word Saterdag in klubdrag gespeel en gewone drag vir die ander dae. Vir klubwedstryde en klubfunksies trek ons ook klubdrag aan.

Fondse

Ledegeld en ander inbetalings wat betaal word moet as verwysing jou naam en van toon, asook waarvoor jy die betaling maak. Dit sal die Tesourier se taak aansienlik vergemaklik.

Klubfooie kan verkieslik direk in die klub se bankrekening inbetaal word.

Bankbesonderhede:

Centurion Bowling Cub
ABSA Centurion
Rek no 405 332 3178
Kode 632005
Tjekrekening

Ledegeld plus BGN affiliasiefooie is ten volle betaalbaar teen 31 Oktober 2023.

Status ouderdom, 1 Julie 2022

Kategorie	Ledegeld	Affiliasie	Totaal
Bo 75	R1620	R520	R2140
Onder 75	R1830	R520	R2350

Spesiale reëlins vir afbetaling kan met die tesourier gereël word.

Kontak Marieta Fourie by: secretary@centurion-bowls.co.za of Marieta.fourie@dustaside.com

Boeke

Snuffel gerus in die boekrakke vir iets om te lees en huistoe te neem. Daar is 'n kassie waarin jy R5 per boek moet ingooi. As jy klaar gelees het, bring die boek asseblief terug sodat iemand anders ook die leesgenot daarvan kan hê. Baie dankie, Judy, vir die versorging van ons boeke.

Diensrooster

Aangebring op kennisgewingbord.

GREENS AND FACILITIES

The upkeep of the greens and facilities provide continuous and sometimes severe challenges, almost from day to day. Bosman Olivier and Ernst Müller (greens) and Etienne Olckers (facilities) deserve our heartfelt appreciation for hard work, mostly done far from the limelight. Thanks, guys, multiplied thanks!

KLEINJAN

Ma, ek het 'n wonderlike ondervinding ge belewe verlede week. Ma weet mos die skole het gesluit vir twee weke. Poena het my en vir oom Flippie uitgenooi om saam te gaan na 'n jagsplaas waar ons kon gaan tarentale en fisante jag. Ons kon nou wel eers 6:00 inboek wat ons toe betyds gemaak het. Ag askuus ma, môre ma.

Ons het so lekker ge belewe dat dit amper onbeskryflik was. Hulle het ons so baie in agge neem dat ons tot agter op die bakkie kon ry.

Hulle sê my toe daar is Giraafs ook en ek moet mooi kyk voor ek skiet want hulle verander van lengte maar nie van kolle nie. Nie soos 'n tarentaal nie. Party mense is blykbaar ook so, maar net soos 'n jakkals se hare en streke.

Ons was gewaarsku dat die big-five ook daar is. 'n Buffel bul en 'n Buffellin met hulle se drie kinnars ook.

Ons het in die bos geloop waar die bakkie nie kon ry nie toe ons jou wrintie op die big-five afkom. Oomie Flippie het hom in 'n ander dimensie in geskrik en begin hardloop. Die Buffellin dog toe seker dit was 'n aanval op haar se kinnars en was op dieselfde roete agterna, seker om haar bul en kinnars te beskerm. Oom Flippie het die eerste maroelaboom met 'n spoed bestyg en die buffel dame van bo af gade geslaan. Ma hy sê hy het nie geweet 'n Buffellin kan so sleg ruik nie. Nadat hy uit die boom gered was het daardie reuk nog die heel dag aan hom gekleef. Ons kon toe ook geen tarentale kry nie want ek dink hulle was ook op daardie stadium deur die mis.

Ma, die liga spanne oefen nou elke Saterdag oggend saam om 'n eenparigheid te wees. Hulle moet soos vinkel en kalender wees net soos ons Springbokke. Saam staan en saam rol is nou the name of the game.

So van die Springbokke gepraat. Toe ons in die semi fainils teen die Engelse gespeel het gebeur daar mos 'n imposante insident. Dit was net so voor hulle in die onderspit gedelf het. Een Ingelsman gaan kla toe by die amperse regverdige ref dat onse hakker by name Bonkie Mombanambie, hom laag gevat het in die lynstaan. Hy was baie seergemaak deur die insident. Dit was glo erg pynlik. Bonkie het blykbaar geslagtelik na hom verwys met die laagvat. Bonkie kon nie eens aan hom vat nie want hy het op die kant gestaan om die bal in die lynstaan te besorg. Mens kan weer sien dat as jy tweede kom maak jy soos 'n sokkerspeler, jy rol rond, hou jou been vas en kry 'n uitdrukking van pyn.

Met al hierdie gevattery het onse bokke weereens die vergulde beker van die wêreld gewen. Wat 'n persentasie vir ons agtergeblewende kaptyn Sieha.

Ma, Dokter Tet vertel vir my dat sy jonger broertjie, klein Tettie, sê, as dit krag af is by hulle en die tyd is tussen vier uur en ses uur in die middag, is dit vir hom en sy nuwe gadgetjie sooo lekker om in die tuin te werk. Dit is mos daardie tyd in die dag nie meer so snik heet nie. Hulle begin op 'n punt in die tuin en haal al die ongevraagde onkruite uit. 'n Mens kry mos die plat suurrinktjies en ook die uintjies wat so diep groei. Daardie soort wat sommer so oorals opkom. Dit is blykbaar nie 'n probleem vir hom en sy gade nie.

Siende dat Tettie ook mal is oor visvang, vat hy sy visvang kampstoeletjie saam met 'n bottel wyn en so vêr as wat sy spit en onkruite uithaal skyf hy saam met sy stoeltjie en wys vir haar waar sy dalk enetjie gemis het. Die twee ure hou net mooi op een bottel wyn en een bier. Hulle geniet dit vreeslik en kan nie wag vir die volgende week se tussen vier en ses nie.

Tannie Dawn wat die hemde en broeke maak het hierdie jaar weereens krismis vrugtekoekke van die stapel gestuur. Sy het egter die litte van die klub wat bestellings ingesit het, 'n "black-fryday" special gegee. Sy bak nou die koeke in bietjie kleiner pannetjies dan kry jy two for the price of one. Jaco elektriecin verkoop weer volstruis eiers, noudat die hoeners grieperig is. Daar slaan jy nou 'n ekstra bargain. Vier en twintig in een. Also for the price of one. Ja ma, nogal in een houer verpak.

Mammie ek moet nou skiderrel en regmaak om die blond vir koffie te vat. Alles wat groetnis is daar aan die bekendes.

Kleinjan.

..... EN TEN SLOTTE

Dit is onbekend of die legendariese John Wayne wel rolbal gespeel het, maar sy vyf lewensreëls kan in mindere of meerdere mate van toepassing wees

- 1 Geld koop nie geluk nie, maar dis gemakliker om in 'n Mercedes te huil as op 'n fiets.
- 2 Vergewe jou vyand, maar onthou sy naam.
- 3 Help iemand wat in die nood is, en hy sal jou onthou - wanneer hy weer in die nood is.
- 4 Baie mense lewe nog bloot omdat dit onwettig is om hulle te skiet.
- 5 Alkohol los geen probleme op nie - maar aan die anderkant, melk doen dit ook nie.

(Ingestuur deur Wim van der Waals.)

ooOoo

Stuur asb jou nuuswaardighede aan Gerrit Kamper by kampergd9@gmail.com , praat met hom op die rolbalbaan of in die klubhuis, of skakel met hom by 0731715630.

Besoek gerus ons webwerf by: www.centurion.bowls-club.co.za en ook ons Facebook blad by <https://www.facebook.com/Centurion-Rolbalklub-Bowling-Club>.

Neem ook kennis van die Klub se e-posadres: secretary@centurion-bowls.co.za

Wanneer u e-pos aan hierdie adres stuur, sal dit minstens al die lede van die Dagbestuur bereik.